

statimque *Dunstable* devenimus, quod in solo cretaceo situm, incolis satis frequens, & diversis plenum, quatuor habet plateas ad quatuor mundi plagas, in quibus singulis, cum solum sit siccissimum, quatuor in publicum usum sunt lacunæ, quæ quamvis pluviæ solummodo aqua alantur, nunquam deficiunt. Fontium vero venæ non inveniuntur, nisi puteos in viginti quatuor cubitorum altitudinem agant. In medio Crux sive potius columna visitur Angliæ, Castiliæ, & Pontivi insignibus insculpta & statuis decorata, quam Rex Edwardus Primus in *Aleonoræ* conjugis memoriam ut alias nonnullas posuit, quacunque ejus funus exequiali pompa *Westmonasterium* deduxit. Hoc fuisse illam stationem quam Antoninus Imperator in suo Itinerario *MAGIONINIVM*, *MAGIOVINIVM*, & *MAGINTVM*, appellat, non est cur quispiam dubitet, aut alibi quærat. Nam præterquam quod ad viam militarem Romanorum adsidet, *Cæsarum* nummi in agris circumvicinis à subulcis subinde reperiuntur, quos *Madning monye* adhuc vocant, & parum abest ad ipsum *Chilternorum* collium descensum sepimentum militare in orbem circumductum, ejusmodi *Britannorum* oppida fuisse prodit *Strabo*, quod novem jugera continet, & *Madning-bovre* & *Madinbovre* appellitant; in quo nomine parum variato *MAGINTVM* se planissime ostendit. Sed cum *MAGINTVM*, vel belli, vel ævi injuria cecidisset, *Henricum* primum hic oppidum reedificasse, ædesque Regias ad *Kingsbury*, & coloniam ad latronum audaciam reprimendam, qui viam obsederant, collocasse, privata historia monasterioli, quod ipse ad coloniam suam ornamentum fundavit, plane contestatur. Sed habe ipsa verba ex historia illa privata, licet ejus seculi barbariem redoleant, Nota quod area illa ubi via *Watling* & *Ikening* conveniunt, per *Henricum* Regem Angliæ Seniores primitus sartabatur ad malitiam cujusdam famosissimi latronis *Dun* nomine, & sociorum suorum refranandum. Et ab ipso *Dun* dictus locus *Dunstable* vocabatur. Dominus Rex ibidem Burgum *Dunstable* condidit, fecitque sibi juxta illum locum regiam mansionem. *Burgenses* liberi erant per totum, sicut ceteri *Burgenses* regni Regis. Rex habuit in eadem villa nundinas & mercatum. Postea fun-

Magiovinium.

avit Ecclesiam, & autoritate *Eugenii III* Papæ posuit ibi *Canonicos Regulares*, & dictos religiosos ad toto Burgo feofavit per *Chartam*, & eis plurimas contulit libertates.

Nunc de *Bedfordiæ* Dominis, Ducibus & Comitibus. Primum fuerunt *Barones Bedfordiæ* familia de *Bellocampo*, qui regibus Angliæ die inaugurationis jure hæreditario erant *Eleemofynarii*. Quorum hæreditas cum jam per filias in *Moxbrajorum* nomen, *VVake* & *Fitz-Ottes*, &c. dispersita fuisset, *Edwardus III* Engelramum de *Coucy* *Suessionum* in *Gallia* Comitem cui filiam elocarat, primum *Bedfordiæ* Comitem creavit. Postea *Henricus Quintus* *Bedfordiam* in Ducatum titulum evexit, tresque *Duces* habuit, primum *Ioannem Henrici III* filium tertium, qui *Gallos* navali prælio ad *Sequanæ* ostium, & postea *Franciæ Regem* terrestri ad *Vernolium* fortissime profligavit, *Rothomagi* sepultus, & una cum illo bellica *Anglorum* in *Gallia* felicitas. Cujus monumentum cum *Carolus Octavus* Rex *Galliæ* inviseret, nobili adstanti qui demoliri suavit, *Requiescat*, inquit, jam mortuus in pace, quem vivum in bello *Gallia* pertimuit. Secundus *Bedfordiæ* Dux erat *Georgius Nevill* puerulus, filius *Ioannis* *Marchionis Montifacuti*, quos eo honorum statim atque evexisset, etiam dejecit *Rex Edwardus Quartus*, idque autoritate *Parlamentaria*; patrem ob perfidiam cum ab eo defecisset, filium in patris invidiam: prætexebatur tamen quod ad *Ducis* dignitatem tuendam ob inopiam impar esset; magnatesque ab opibus minus instructi vicinis semper sint graves atque iniquiores. Tertius erat *Iasper* de *Hatfield* Comes *Penbrochiæ*, à nepote *Henrico Septimo*, quem ex maximis periculis eripuisset, eo titulo exornatus, qui senex & cælebs è vita migravit.

Patrum vero memoria in Comitatus titulum recidit, cum *Rex Edwardus Sextus* *Ioannem Russell* *Bedfordiæ* Comitem creavit, cui successit filius *Franciscus*, vir ea pietate & nobili naturæ facilitate, ut nunquam magnifice quicquam in ejus dicam laudem, quin id ejus virtus longe superaverit. Successorem autem ille reliquit *Edwardum* è filio *Francisco* nepotem, avitis laudibus succrescentem.

Bedfordiæ  
Duces,  
Comites,  
& Barones.

Habet hæc provinciola paræcias 116.